



**FONO AOAQ FAITULAFONO.
LEGISLATIVE ASSEMBLY OF SAMOA**

**Lipoti a le Komiti o Mataupu Tau
Faamasinoga, Leoleo & Falepuipui, ma
Faamasinoga o Fanua & Suafa**

i le

**P.P.2014/2015 Nu.123, Lipoti
Faaletausaga a le Matagaluega o
Faamasinoga ma le Faafoeina o Tulaga
tau Faamasinoga mo le Tausaga
Faaletupe 2012–2013.**

(Tuuina atu i le Fono Aoaq Faitulafono)

FAUTUAGA:

Ua fautuaina e le Komiti o Faamasinoga, Leoleo & Falepuipui, ma Faamasinoga o Fanua ma Suafa le Fono Aoao ina ia faautagia lana Lipoti.

1. IUGAFONO:

I le maea ai o Iloiloga a le Komiti, na faaiugafonoina ai e fautuaina le Fono Aoao,

Ina ia faamaonia P.P.2014/2015 Nu.123, Lipoti Faaletausaga a le Matagaluega o Faamasinoga ma le Faafoeina o Tulaga Tau Faamasinoga mo le Tausaga Faaletupe 2012–2013.

2. FAUTUAGA:

I le maea ai o Iloiloga a le Komiti na faaiugafonoina ai e fautuaina le Malo ina ia:-

1. Silasila i ni aiaiga talafeagai mo le filifilia o ni Faamasino agavaa ma talafeagai mai le Faamsinoga Maualuga ma le Faa-Itumalo e avea ma Sui Peresetene e taitaia iloiloga a le Faamasinoga o Fanua ma Suafa mo so o se Talosaga Apili. O lea tulaga o le a vave tagofia ai le tele o mataupu e le i tagofia i le taimi nei, ma vave ai ona tali atu i faasea a le atunuu lautele.
2. Tuuina atu le lagolago e ala i le siitia o Vaegatupe Faatatauina mo le Matagaluega e fesoasoani ai i le faatupeina o nisi o ana galuega faatino o lo o ave iai lana faamuamua i le taimi nei.

3. SAILIILIGA:

O le Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga mo le Tausaga Faaletupe 2012/2013, o lo o auiliili atu ai nisi o Polokalame o Fuafuaga Alualu Mamao ma Galuega Faatino na mafai ona ausia e le Matagaluega i totonu o lenei tausaga faaletupe e pei ona lipoti mai.

3.1.**TOFA MAMAO**

Amiotonu mo le Saogalemu o Samoa

3.2.**MANULAUTI**

Ofoina atu o auaunaga lelei ma le atoatoa mo se manuia ma le saogalemu o Samoa

4. ILOILOGA A LE KOMITI:

O le Lipoti Faaletausaga 2012-2013 a le Matagaluega o Faamasinoga ma le Faafoeina o Tulaga Tau Faamasinoga, o lo o folasia manino mai nisi o galuega taua sa faatinoina i lea tausaga e aofia ai le tapenaina o ana Fuafuaga Autasi (Corporate Plan) e faatulagaina ai ana galuega mo le isi lima tausaga i le lumanai. O le faamoemoe lava ina ia mataitu le siitia pea o le galulue faapaaga a le Matagaluega ma le atunuu ma ia tausisi i alafua o lo o faatino ai galuega a le Matagaluega. E le gata i lea, o le moomiaga ina ia faatautaia le faalauteleina o auaunaga e autovaa i ai le atunuu ma faatupulaia manaoga o auala faatekonolosi faa-nei-ona-po mo le vaaia lelei o faamaumauga faa-Faamasinoga ma vave faatino ai galuega.

I le maitau ai e le Matagaluega i tausaga ua tuanai, o se tasi o faafitauli sa tele ina molimauina, o le toagaogao o le faitau aofai o le aufaigaluega a le ofisa. Peitai na maua e le Komiti, o le 2012-2013 sa amata ai ona talia e le Komisi o le Aufaigaluega o Galuega a le Malo le faatupeina ma le tuuina mai o nisi o tupe e fesoasoani ai i lea tulaga ma mafai ai e le Matagaluega ona faatumuina isi o ana avanoa faigaluega e tusa ai ma moomiaga mo le solo lelei o le faatinoina o le auaunaga.

Na faamaonia mai foi e le Matagaluega, e lei gata ina faaopoopoina i lenei tausaga faaletupe fuainumera o le aufaigaluega lava ia, ae sa faapena foi ona faatulai mai ai nisi Alii Faamasino fou e toatolu. Maitauina e le Komiti, o lenei faaopoopoga ua siitia ai nei le aofaiga o Faamasino mo le Faamasinoga o Fanua ma Suafa i le sefulu ma le iva (19). O le faamoemoe ma le talitonuga a le Matagaluega, o lea fainumera e fuafuaina e faatupulaia pea i le lumanai pe a tusa ai ma le Tala Faatatau o Tupe. O se tasi foi lea o fuafuaga o lo o fesoasoani i le vave fofogaina o mataupu e tuuina mai i le Faamasinoga ma e faaauau pea le iloilona o lea moomiaga i le lumanai.

O le isi faafitauli tele sa silasila iai le Matagaluega ma o lo o molimauina pea i le taimi nei, o le faamaumauina o taualumaga o lo o fofogaina i Faamasinoga aemaise lava i le Faamasinoga o Fanua ma Suafa. O le tele foi o taimi, e tãpã ai e le Matagaluega tusi faaseã mai le atunuu ona o le lē atoatoa pe sese foi ni faamaumauga o lo o latou mauaina. Peitai i lea tulaga sa mafai ai e le Matagaluega ona saili se fesoasoani e foia ai lea mataupu ma taua ai e faapea, ua iai nei le faamoemoe e faataunuuna ai i le tausaga nei le faatupeina ma le faapiiina o masini ua faaaupagaina i polokalame talafeagai mo le pueina o taualumaga uma i totonu o potu

Faamasino e 12. Matauina ai foi e le Komiti i lea tulaga le amanaiaina e le Matagaluega ma le Malo o lana fautuaga i le vave tuumasiniina o faamaumauga mo manaoga a le atunuu.

E tusa ai foi ma molimau a le Matagaluega, sa tasi lava le vaega na aofia uma iai le Vaega o Auaunaga Lautele ma le Vaega o Faamaumauga, peitai i le matau a le Matagaluega, o le Vaega o Faamaumauga o se tasi o vaega pito sili ona taua i totonu o galuega faa-Faamasinoga. O lea na manatu ai le Matagaluega i le tuueseeseina o vaega nei, ma faatuina le Vaega o Faamaumauga i lalo o le vaavaaiga o lana ia lava Ofisa Sili o Pulega Lagolago ma le naunautaiga ina ia faaleleia atili faamaumauga uma e tusa ma moomiaga a le Faamasinoga aemaise o le atunuu.

I le tulaga tau seleni i totonu o lenei lipoti faaletausaga, o le talitonuga a le Matagaluega o lo o gafatia lava e seleni sa tuuina atu le faatinoina o galuega o lo o mafai ona galulue ai le ofisa i le taimi nei. E tusa ai ma faamaumauga o le lipoti, e \$9,308,934.00 le tupe sa faamatuu atu e le Malo mo lea tausaga faaletupe 2012-2013. I lea tulaga na lausilafia ai e le Komiti, e 9% lona siitaga pe a faatusatusa i le tala faatatau o le tupe tausaga faaletupe 2011-2012. Na taua e le Matagaluega se tasi o mafuaaga o le faaopoopoina o lea vaegatupe, ona o le faatuina lea o le Vaega o Faamaumauga ma Resitalaga o lo o aofia uma iai le vaega o Faamaumauga, Faafonokarafi ma le Vaega o Resitalaina o mataupu i le Faamasinoga. E le gata i lena, o le faaopoopoina o Faamasino fou e toatolu i le Faamasinoga o Fanua ma Suafa ma le Tamaitai Faamasino mai Niu Sila, ua tofiaina i le Faamasinoga Mauualuga.

I lalo o le vaega tau Galuega e avea ai ma Sui o le Malo i le tala faatatau o le tupe, na matauina ai e le Komiti se siitaga e 14.7% o le tupe na faaagaaga mo lea vaega pe a fua atu i le tala faatatau o le tupe 2011-2012. O le molimau a le Matagaluega e tusa ma le faavae o lea vaega, e lua poloketi sa faamatuu mai ai e le Malo vaegatupe mo lona faatinoina e ese mai isi vaegatupe masani e aofia ai tupe e totogi ai Loia, Totogiina o le Fale o le Malo mo le ofisa o le Minisita faapea ma le Aoina o Lafoga (VAGST) mai vaega taitasi. O le isi itu sa galulue iai le Matagaluega o le faaleleia o le Maota o le Faamasino Sili i Lelata e aofia ai le fausia o ni tane mo faleui.

I le aotelega o Tupe Toe Faaolaina Mai i le tausaga faaletupe 2012-2013, e 3.5% ua pau ai nei pea faatusatusa i le tausaga faaletupe 2011-2012. I le maitau a le Matagaluega, o le faaitiitia o Fale Ata o lo o faatinoina lea auaunaga i le taimi nei, o se tasi lea o mafuaaga o le pau o tupe

toe faaolaina mai a le Matagaluega ona ua mafai e le toatele o le atunuu ona maua mai ata tifaga mai auala faatekonolosi ma aupega tafailagi.

Na fesiligia e le Komiti le Matagaluega i le tulaga o lo o iai nei tupe faatatau tuuina atu mo le poloketi o le Fesoasoani Faale-Tulafono (Legal Aid). Matauina o lo o tumau pea lea vaegatupe i lona aofaiga masani - \$250,000.00 talu mai ona amatalia lea poloketi. Na taua e le Matagaluega, i le taimi nei e le'o toe gafatia e lea vaegatupe le tali atu i manaoga e tusa ma fuafuaga faataatitia o le poloketi. E manatu foi le ofisa, o lo o toatele pea nisi o tagata o le atunuu e finagalo e fia faaoo atu iai le fesoasoani peitai ona o lea faafitauli e le'o mafai ai ona faataunuuna. Na faamaonia foi e le Matagaluega, sa tapena muamua ma tuuina atu la latou talosaga mo le faaopoopoina o le aofaiga o le vaegatupe mo le poloketi, ae peitai e le'i taliaina. Ae o le faamoemoe a le Matagaluega i lea tulaga, o le a faaauau pea le talosagaina o le siitia o vaegatupe o lea fesoasoani aua lava le faaleleia o le auaunaga tuuina atu mo le atunuu. O le talitonuga foi a le Komiti, e tatau ona toe silasila le Malo i le faaopoopoina o le tala faatatau o tupe mo le poloketi, aua o lo o moomia pea e tagata o le atunuu lea fesoasoani e pei ona faaalua mai e le Matagaluega.

Faamaonia mai e le Matagaluega, o le tele o mataupu tau faamasinoga o le Faamasinoga o Fanua ma Suafa, o lo o faasee sao atu e avea ma mataupu tau Faamasinoga o Faamasinoga o Talosaga (Apili) e tauala atu i Talosaga a nisi o Itu Faamasinoga i taimi e maea fofoga ai Faaiuga o a latou mataupu. I le taimi nei, o se tasi lea o faafitauli ua feagai ma lea vaega o le Faamasinoga ona ua faateleina ma faatupulaia Apili ma atili tuai ai ona faagasolo taualumaga o le Faamasinoga. O le afuaga foi lea o faasea a le atunuu, ona o le tuai tagofia e le Faamasinoga o Fanua ma Suafa o a latou mataupu toe iloilo ma Apili. Ua fautuaina ai e le Komiti le Malo ina sei silasila i le tofiaina o Sui Peresetene o le Faamasinoga o Fanua ma Suafa, pe lei alagatatau ona tofia i latou e agavaa e avea ma Faamasino o le Faamasinoga Faa-Itumalo ma le Faamasinoga Maua-luga.

5. MOLIMAU:

Matagaluega o Faamasinoga ma le Faafoeina o Tulaga Tau Faamasinoga:

Masinalupe Tusipa Masinalupe	-	Ofisa Sili o Pulega
Papalii John Taimalelagi	-	Ofisa Sili Lagolago o Pulega <i>Ofisa o Faamasinoga i Tuasivi</i>
Tuiloma Lopez Williams	-	Ofisa Sili Lagolago o Pulega

Vaega o le Faamasinoga o Fanua & Suafa

Ronnie Fereti	-	Ofisa Sili Lagolago o Pulega, <i>Vaega o le Lala o Tulafono ma le Amiotonu</i>
Soara Siamomua	-	Ofisa Sili Lagolago o Pulega <i>Vaega Vaavaaia Mataupu tau le Aufaigaluega</i>
Motunuu Teofilo	-	Ofisa Autu <i>Vaega Nofovaavaaia ma Palola</i>
Li'o Heinrich W Siesen	-	Ofisa Sili Lagolago o Pulega <i>Vaega o Faamasinoga o Solitulafono ma Feseeseaiga Lautele</i>

6. TULAFONO TUMAU 173:

E tusa ai ma aiaiga o le Tulafono Tumau 173, o le a avea ma tiute o le Komiti o Mataupu Tau Faamasinoga, Leoleo & Falepuipui ma Faamasinoga o Fanua ma Suafa:-

- (a) **Le Iloiloina o so o se Tulafono Tau Faaofi, talosaga po o so o se isi mataupu ua tuuina atu i ai e le Fono Aoa po o e tusa ai ma Tulafono Tumau; ma Tala Faatatau o Tupe po o le toe iloiloina o le faatinoina o galuega a Matagaluega e pei ona tuuina atu i ai e le Komiti o Tupe Maua ma Tupe Totogi a le Malo;**
- (b) **Iloiloina o Tulafono Tau Faaofi mo se mataupu faapitoa;**
- (c) **Le suesueina o faiga faavae, pulega ma tupe alu a matagaluega ma faalapotopotoga a le Malo po o nisi faalapotopotoga e fesootai ma tulaga puipuia o faamatalaga, faamatalaga aloaia, faamasinoga, auaunaga faa-loia, mataupu tau faamasinoga, leoleo, agafaalilolilo, faiga matuia taufaasese, fanua ma suafa.**

7. IUGAFONO:

I le maea ai o Iloiloga a le Komiti, na faaiugafonoina ai e fautuaina le Fono Aoa,

Ina ia faamaonia P.P.2014/2015 Nu.123, Lipoti Faaletausaga a le Matagaluega o Faamasinoga ma le Faafocina o Tulaga tau Faamasinoga mo le Tausaga Faaletupe 2012–2013.

TUISA Tasi Patea
TAITAIFONO

AFOAFOUVALE John Moors
SUI TAITAIFONO

LAFATELE Patrick Leiataualesa
SUI USUFONO

TAPUAI Toese Ah Sam
SUI USUFONO

PAPALII Lio F Taeu Masipau
SUI USUFONO

LENATAI Victor Fafoi Tamapua
SUI USUFONO

LEFAU Harry Schuster
SUI USUFONO.

Erosi Koria
FAILAUTUSI O LE KOMITI